

主席你好，我叫黃月嫻，今年 **67** 歲，係一位拾荒者，同時都有參與拾平台為拾荒者爭取權益嘅工作。

我想從自己嘅遭遇嚟話俾啲政府聽，長者出嚟搵嘢做有幾困難，我地老人家面對貧窮有時係好被動同埋無奈，社會支吾支持長者係好重要嘅。

我係一位已退休嘅低級公務員，每月攞得三千蚊嘅退休金同攞綜援係差吾多，一個人住喺公屋，交左租同埋其他生活雜費之後，剩番嘅根本係要好慳好慳先至可以生存倒，而家喺香港生活水平咁高，如果我地吾出嚟做嘢，根本係好難嚟呢到生活。

喺幾年前開始，我已經開始嘗試搵嘢做，我吾係吾想搵亦吾係吾想做，只係個社會對待我地吾係咁友善，你地又話鼓勵長者就業，咁究竟做左 **D** 咩幫倒我地呢？我試過搵好多份工都食白果呀！

1) 我試過打電話想去見兩份診所清潔嘅工，都有左音訊。

2) 又去過見鐘點工人，份工又要湊放學又要送飯要煮飯，但個工資係好低好平好剝削擺明係恰我地老人家睇吾起我地。

3) 見過快餐店做侍應，嗰一次我仲記得同另外一個後生啲嘅女人應徵，我都想問個經理叫佢俾份表我填，問佢可吾可以請我，跟住佢擺左份表嚟俾左嗰個女仔，對住我就一笑置之，吾理我行左去，我喺到諗駛吾駛咁呀！吾通我真係咁吾適合做嘢咩？跟住我朋友同我講：「吾通佢會話俾你聽佢地有年齡歧視咩！」

好多工都只係等電話冇回覆嘅，若果考左個保安牌就真係會請我咩？有啲老人家好似我地咁本身又有長期病患嘅，身型又矮可能有啲仲有少少陀背嘅，其實啲僱主係會有選擇架吾係咁易請。

好啦政府又話有啲做社會服務嘅工作但係開嘅位都吾夠我地去做啦，就算有培訓咁又點呢？始終太多基層嘅長者啦，根本職位都吾夠供應。

我想建議政府不如諗下好好規劃長者就業嘅措施啦，俾多 D 吾同工種嘅選擇我地，同 D 僱主講清楚吾好年齡歧視，就算係粗重工作，都試下幫我地改善下工作環境，友善 D 安全 D，可以令一班長者有尊嚴去做嘢。

而家我地剩係來來去去都只係可以做洗碗呀，清潔工呀執紙皮呀呢啲工，一個老人家去做好辛苦架，我地根本冇得選擇呀，呀局長你試下做下呀又吾見你地去做，點解剩係要啲基層長者去做呢？

我地可吾可以有更多嘅選擇呢？又或者你想減低長者貧窮率，除左係叫我地做嘢，又可吾可以喺社會福利方面去諗呢？例如社區支援，整體嘅醫療系統支援，全民退休保障係所有長者嘅權利，有基本嘅生活工資，收入好 D 等等。

我地喺香港做左嘢四五十年，已經好劬，可吾可以令我地過得有尊嚴，舒適啲嘅晚年生活俾我地呢班老人家呢？